

حضرت عیسیٰ اپٹے پیروکاراں کی دُعا سِخائے انٹ

1 اک واری اِسرَح ہویا کہ حضرت عیسیٰ
11 کُسے جِغہ دُعا پٹے کرنے سن۔ جس

ویلے اُنہاں دُعا ختم کیتی، تے اُنہاں نے صحابیاں
وچوں اک صحابی اُنہاں کی آخیا، ”حُضُور!

جس طرح حضرت یحییٰ اپٹے پیروکاراں کی دُعا
کرنا سِخایا اے، تُساں وی اَساں کی سِخاؤ!“

2 حضرت عیسیٰ اُنہاں کی آخیا، ”جس
ویلے تُساں دُعا کرو تے اِسرَح آخیا کرو،
'اے باپ،

تُہاڑے پاک ناں نی عزت ہووے۔

تُہاڑی بادشاہی اچھے۔

3 جیہڑا رزق اَساں کی چاہی نا اے، ہر دیہاڑے اَساں
کی دے۔

4 جس طرح اَساں دُویاں لوکاں نے قُصُور معاف

کرنے اَن،

تُوں وی اَساں نے غُناہ معاف فرما۔

تے آساں کی آزمائشاں وچ ناں بہا۔“

5 فر حضرت عیسیٰ صحابیاں کی آخیا، ”فرض کرو تساں وچوں کوئی اپٹے کسے سنگیے نے کہہار آدھی راتی جائی کے آخے، ’یرا! مکی ترے روٹیاں دے۔ 6 مہاڑا اک سنگی بہوں دُوروں مہاڑے کہہار آیا اے، پر مہاڑے کول اسی کھوالٹے واسطے کجھ وی نی۔‘ 7 او بندہ اسی اندروں جواب دے، ’یرا! مکی تنگ ناں کر۔ ہن میں دروازہ بند کری شوڑیا اے، تے میں تے مہاڑے کھرے آلے وی سیئی گئے ان۔ میں تے اٹھی کے تکی کجھ وی ناں دیئی سکٹا۔‘ 8 پر میں تساں کی دسی شوڑاں کہ آخرکار کدے او بندہ اپنی دوستی نی وجہ توں ناں وی دے، فر وی اس وجہ توں اسی ضرور اٹھی کے بقدر ضرورت کھاٹا چائی دیسی کہ او اُس نا پچھا نی پیا چھوڑنا۔

9 اس واسطے میں تساں کی آخٹاں، اللہ کولوں منگو تے او تساں کی ضرور دیسی۔ اسی لوڑو، تے او تساں کی لبھسی۔ اُس نا دروازہ ٹھکورو، تے دروازہ کھلسی۔ 10 کیٹانکہ جیہڑا کوئی اللہ کولوں منگرے،

اُسی دِتا جاٹا اے۔ جیہڑا اُسی لوڑے، اُسی او لبھٹا
 اے۔ تے جیہڑا اُس نا دروازہ ٹھکورے، دروازہ کھلسی۔
 11 تُساں وچ ایئے جہیا کُن اے، جس کولوں اُس نا پُتر
 مچھی منگرے تے او اُسی مچھی نے بجائے سب دے؟ 12 یا
 اگر او اَنڈا منگرے تے اُسی بچوں چائی دے؟ 13 سوچو،
 کدے تُساں بُرے ہوئی کرے وی اپنی اولادی کی چنگیاں
 چیزاں دیٹا چاہٹے او، تے اِسے طرح تُساں نا آسمانی باپ
 وی اپنرے منگٹے آلیاں کی رُوح پاک ضرور دیسی۔“

عیسیٰ اِبلِیس کی شکست دیتے اِن

14 اِک واری اِسرح ہویا کہ حضرت عیسیٰ کُسے بندے
 وچوں ایئے جہیا جنّ کڈھیا جیہڑا اِنسان کی گونگا کری
 شوڑنا اے۔ جیہڑے ویلے او جنّ نکلیا تے گونگا بولن لگی
 پیا۔ اے چیز تکی کرے لوک بہوں حیران ہوئی گئے۔ 15 پر
 اُنہاں وچ کجھ ایئے جہے لوک وی سن جیہڑے آخترے
 سن، ”اے جنّات نے سردار اِبلِیس نی مدد نال لوکاں
 وچوں جنّ کڈھنا اے۔“ 16 کجھ ایئے جہے لوک وی سن

جیہڑے حضرت عیسیٰ کی آزماٹا چاہئے سن۔ اس واسطے
 انہاں حضرت عیسیٰ آگے فرمائش کیتی کہ او کوئی ایسے
 جہیا مُعجزہ دسٹ، جس تُوں ثابت ہووے کہ او واقعی اللہ
 تعالیٰ نی طرفوں ہی اٹ۔¹⁷ پر حضرت عیسیٰ کی انہاں نیاں
 خیالاں نا پتہ لغا۔ اس واسطے انہاں آخیا، ”جس مُلخ نے
 لوکاں وچ اتفاق ناں ہووے، او مُلخ بھوں جلدی برباد ہوئی
 جاٹا اے۔ تے جس خاندان وچ اتفاق ناں ہووے، او وی
 برباد ہوئی جاٹا اے۔¹⁸ اسرح اگر ابلیس اپٹے ہی خلاف
 ہوئی جائے، تے اُس نی حکومت کسرح قائم رہی سکتی
 اے؟ فرٹساں کسرح مہاڑا آخی سکتے او کہ میں شیطانی
 مدد نال جنّات کڈھٹا آں؟¹⁹ تے کدے میں جنّات نے
 سردار نی مدد نال جنّ کڈھٹا آں، تے فرٹساں نے اپٹے لوک
 جنّ کس نی مدد نال کڈھے اٹ؟ اے گل تے آپوں ہی ٹساں
 نے الزام کی غلط ثابت پئی کرنی اے۔²⁰ پر حقیقت اے
 اے کہ اللہ تعالیٰ مکی جنّات کڈھٹے نی طاقت دیئی کہ
 اے پیا ثابت کرنا اے کہ اُس نے راج نا ویلا آئی گیا اے۔“

21 فر انہاں آخیا، ”اگر کوئی ڈاڈہ بندہ ہتھیار ہٹی کے
 اپٹے کھرے نی حفاظت پیا کرنا ہووے، تے اُس نا مال
 محفوظ رہٹا اے۔ 22 پر کدے کوئی اُس کولوں وی زیادہ
 زور آور بندہ اُس اپر حملہ کری کے فتح ہٹی کھنے،
 تے او اُس نے سارے ہتھیار جنہاں اپر اُسی بھروسہ
 سی کھوئی کھننا اے، تے اُس نا مال لٹی شوڑنا اے۔
 23 جیہڑا مہاڑے نال نی، او مہاڑے خلاف
 اے۔ تے جیہڑا مہاڑے نال رلی کے لوکاں کی
 اکٹھا نی کرنا، او لوکاں کی کھلیارنا اے۔
 24 جیہڑے ویلے کُسے بندے وچوں جنّ نکلٹا اے،
 تے او کُسے ویران تے بیابان جغہ وچ آرام حاصل کرنے
 واسطے پھرنا رہٹا اے، پر اُسی آرام نی لبھٹا۔ تے فر او
 آخٹا اے، ’میں اپٹے اُسے گھرے وچ واپس جاساں
 جس وچوں میں نکلی کے آیا ساں۔‘ 25 جیہڑے ویلے او
 واپس اُتھے جاٹا اے، تے کھار صاف سُتھرا ہونٹا اے۔
 26 فر او کے کرٹا اے کہ جائی کے اپٹے کولوں زیادہ
 بُرے ست جنّ ہور اپٹے نال ہٹی کے اچھٹا اے۔ تے

او سارے اُتھے رہنا شروع کری کہہنے ان۔ اسرح اُس بندے نا حال پہلے کولوں زیادہ بُرا ہوئی جاٹا اے۔“

27 حضرت عیسیٰ اے گلاں پئے کرنے ہی سن کہ لوکاں وچوں اک جنائی اُچی آواز وچ آخیا، ”خوش نصیب اے تکی جمٹے آلی تے جس تکی اپٹا ددھ پیالیا!“

28 اے گل سٹی کے حضرت عیسیٰ آخن لغے، ”اصل خوش نصیب او لوک ان جیہڑے اللہ تعالیٰ نا کلام سُننے ان تے اُس اپر عمل کرنے ان۔“

حضرت یونس نی زندگی نا سبق

29 جیہڑے ویلے لوکاں نا رش ہون لگا، تے حضرت عیسیٰ آخیا، ”آج گل نے لوک کتنے بُرے ان! انہاں کی مہاڑے کولوں مُعجزے تکئے نا شوق اے، پر انہاں کی صرف حضرت یونس نے مُعجزے نی طرح مُعجزہ ہی دسیا جاسی۔ 30 کیئانکہ جس طرح نینوہ شہر نے لوکاں واسطے حضرت یونس اک نشان بٹی گئے سن، اُسے طرح ابنِ انسان یعنی کہ میں وی اس زمانے نے لوکاں واسطے اک

نشان بٹی جاساں۔³¹ قیامت آئے دیہاڑے مُلکِ سبأ نی
 مَلکہ اللہ تعالیٰ نی عدالت وچ کھلی کے اِس زمانے نے
 لوکاں کی مُجرمِ آخسی، کیئانکہ او حضرت سلیمان کولوں
 حکمت نی تعلیم سُننے واسطے بھوں دُوروں آئی سی۔
 پر تکو! اِتھے تے او اے جس نا مقام حضرت سلیمان
 کولوں وی بڑا اے۔³² قیامت آئے دیہاڑے نینوہ شہر نے
 لوک وی اللہ تعالیٰ نی عدالت وچ کھلی کے اِس زمانے
 نے لوکاں کی مُجرمِ ثابت کرسٹ، اِس واسطے کہ اُنہاں
 حضرت یونس کولوں اللہ تعالیٰ نا پیغام سُنی کے اِپنے
 غناہواں تُوں توبہ کری شوڑی سی، حالانکہ اِتھے تے او
 اے جس نا مقام حضرت یونس کولوں وی زیادہ بڑا اے!“

بدن نیاں بتیاں

³³ ”کوئی بندہ وی بتی بالی کے پہانڈے تھلے یا کُسے
 اوہلی جغہ وچ نی رخٹا، بلکہ کُسے اُچی جغہ اِپر رخٹا
 اے، تانکہ جیہڑا کوئی اندر اچھے اُسی لو لغمے۔³⁴ تُساں
 نیاں اکھیاں تُساں نے بدن نیاں بتیاں اِن۔ جے تُساں

نیاں اکھیاں ٹھیک ہوں، تے تُساں نے سارے بدن کی روشٹی لبھسی۔ جے تُساں نیاں اکھیاں خراب ہوں، تے تُساں نے سارے بدن وچ نیہرا ہوسی۔³⁵ اس واسطے ذرا اپٹے آپ اپر غور کرو کہ تُساں وچ جیہڑی روشٹی آے، او حقیقت وچ نیہرا تے نی۔³⁶ اسرح جے تُساں نا سارا بدن روشٹی نال پریا ہووے تے کُسرے حصے وچ نیہرا ناں ہووے، تے بدن وچ ایئے جہی روشٹی ہوسی جیئے جئی چراغ نے چمکٹے نال تُساں نے بدن اپر ہوئی آے۔

حضرت عیسیٰ فریسی فرقے نے لوکاں تے شریعت نے عالماں اپر ملامت کرنے ان

³⁷ جیہڑے ویلے حضرت عیسیٰ اے گلاں ختم کیتیاں تے فریسی فرقے نے اک بندے اچھی کے انہاں کی کھائے نی دعوت دتی۔ حضرت عیسیٰ اُس نے کہہ گئے تے کھائے واسطے بیہی گئے۔³⁸ فریسی بندہ اے گل تکی کے حیران ہویا کہ حضرت عیسیٰ روایتی طریقے نال کھائے توں پہلے اپٹے ہتھ نی تہوتے۔³⁹ حضرت عیسیٰ اسی آخیا،

”او فریسیو! تُساں کھائے پیٹے نے پہانڈیاں کی باہروں تے
 بھوں تھوئی تھوئی کے استعمال کرنے او، پر اندروں تُساں
 بدی تے لالیچ نال پہرے وے او۔⁴⁰ او بیوقوفو! جس خالق
 آساں کی باہروں بٹایا، اُس آساں کی اندروں نی بٹایا؟⁴¹ اِس
 واسطے اپٹے پہانڈیاں وچ پیٹے آلے مال وچوں خیرات وی
 دیا کرو، تانکہ سب کجھ تُساں واسطے پاک ہوئی جائے۔
⁴² او فریسیو، تُساں اپر افسوس! کیئانکہ تُساں پودنے،
 تہنہ تے ڈویاں سبزییاں نا دسواں حصّہ اللہ نے ناں اپر چائی
 دیتے او۔ پر لوکاں نال انصاف کرنا تے اللہ نال مُحبت کرنا
 پُہلی گئے او۔ تُساں کی چاہی نا سی کہ انہاں بڑیاں گلاں
 اپر عمل کرنے تے انہاں ڈویاں گلاں اپر وی عمل کرنے۔
⁴³ او فریسیو، تُساں اپر افسوس! تُساں چاہئے او کہ بنی
 اسرائیل نے عبادت خانیاں وچ لوک تُساں کی خاص
 خاص جغاں اپر اگے بہالٹ، تے بازاراں وچ تُساں کی
 بھوں ہی ادب نال چُہکی چُہکی کے سلام کریا
 کرن۔⁴⁴ تُساں اپر افسوس! تُساں انہاں پُرائیاں قبران

نی طرح او جیہڑیاں زیمی نال زیمی ہوئی گئیاں اٹ،
 تے لوک ناسمجھی وچ اُنہاں اپروں لنگی جاٹے اٹ۔“
 45 اے گل سٹی کے بنی اسرائیلیاں نے اک شریعت نے
 عالم حضرت عیسیٰ کی آخیا، ”حضور، اسرح نیاں
 گلاں کری کے تُساں آساں کی وی بے عزت کرنے او۔“
 46 حضرت عیسیٰ اسی آخیا، ”او شریعت نے عالمو، تُساں
 اپر افسوس! کیئانکہ تُساں لوکاں اپر بھوں پہار باہٹے او
 جیہڑے مُشکل نال چائے جائی سکٹے اٹ۔ پر تُساں آپوں
 اُنہاں نی مدد کرنے واسطے اک انگل وی نی او لائے۔
 47 تُساں اپر افسوس! کیئانکہ تُساں اُنہاں نبیاں نے مزار
 بٹائے تے سجاٹے او، جنہاں کی تُساں نے پیؤ دادے شہید
 کیتا سی۔ 48 اسرح تُساں آپوں اقرار کرنے او کہ تُساں او
 کجھ پسند کرنے او جیہڑا تُساں نے پیؤ دادے کیتا سی،
 کیئانکہ اُنہاں نبیاں کی شہید کیتا سی تے تُساں اُنہاں
 نے مزار بٹائے او۔ 49 اے ہی وجہ اے کہ اللہ تعالیٰ اپنی
 حکمت نال فرمایا اے، ’میں نبیاں تے خاص صحابیاں
 کی اُنہاں کول پہیجساں۔ او بعضاں کی قتل کرسٹ

تے بعضاں کی تنگ کرسٹن۔⁵⁰ اِس واسطے اِس زمانے
 نے لوکاں کولوں اُنہاں ساریاں نبیاں نے قتلاں نا حساب
 کہندا جاسی جیہڑے دُنیا نے شروع تُوں کہنی کئے ہُن
 تک شہید کیتے گئے اِن۔⁵¹ حضرت ہابیل نے قتل تُوں
 کہنی کئے حضرت زکریا نے قتل تک جسی اللہ تعالیٰ
 واسطے قُربانی دیتے آلی جغہ تے بڑے عبادت خانے نے
 بَشکار قتل کیتا گیا سی۔ یقین کرو کہ اِس زمانے نیاں
 لوکاں کولوں اِنہاں ساریاں قتلاں نا حساب کہندا جاسی!
⁵² او شریعت نے عالمو، تُساں اپر افسوس! جس کُنجی
 نال علم نا دروازہ کھلٹا اے، تُساں او کُنجی لوکاں
 کولوں کھوئی کہندی اے۔ تُساں اِس دروازے وچ
 آپوں وی داخل نی او ہوئے، تے جیہڑے لوک اِس وچ
 داخل ہونا چاہتے سُن اُنہاں کی وی روکی شوڑیا۔“
⁵³ جیہڑے ویلے حضرت عیسیٰ اُس کہارے تُوں
 باہر تری گئے، تے فریسی فرقے نے لوک تے شریعت
 نے عالم اُنہاں نیاں گلاں اپر اعتراض کرن لغی پئے،
 تے طرح طرح نے سوال کرن لغی پئے۔⁵⁴ اُنہاں

نا مقصد سی کہ کُسے طرح حضرت عیسیٰ کی
اُنہاں نیاں اپٹیاں گلاں وچ ہی پھسائی کینٹ۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>